

CUSSEGL GROND

Sessiun d'october 2023

Proposta Bachmann da prender in conclus direct concernent l'installaziun d'in archiv audiovisual da las debattas dal Cussegl grond dal Grischun

Tenor l'artitgel 29 da la Constituziun chantunala èn las sesidas dal Cussegl grond publicas – abstrahà d'intginas excepziuns. Per render accessiblas questas sesidas er ad in public pli vast, pon ellas vegnir persequitadas dapi l'october 2018 durant las sessiuns via livestream. Per il mument n'èsi dentant anc betg pussaivel da guardar las debattas pli tard en l'internet.

Quai è dentant giavischaivel per ils suandants motivs:

- Mo paucas persunas han la pussaivladad da persequitar live las debattas, perquai ch'ellas han lieu durant il temp da lavur normal.
- Cuntrari als protocols verbals pon ellas vegnir messas fitg svelt en la rait.
- La registraziun d'ina fatschenta speziala po vegnir chattada svelt, entant ch'i n'è betg exactamain previsibel en il livestream, cura ch'ina fatschenta vegn tractada.
- Las registraziuns live da las debattas èn in bun pau pli vivas ch'ils protocols scrits.
- Er per persunas giuvnas ch'èn fitg savens e fitg versadas en l'internet, è ina tala purschida interessanta.
- In access facil a las debattas politicas è adina er ina schanza che dapli glieud sa participescha sezza ad ina tala respectivamain s'engascha politicamain.
- Persunas d'instrucziun pon duvrar en l'instrucziun extracts da las debattas, ch'èn interessants per ellas.
- Glieud da la pressa, deputadas e deputads sco er ulteriuras persunas interessadas pon anc ina giada guardar singuls extracts en tutta calma.
- Registraziuns live èn adattadas per intents da scolaziun politica u per exercizis retorics.
- La finala ha ina registraziun ina impurtanza sco funtauna per la perscrutaziun scientifica.

Cunquai che las debattas vegnan gia transmessas via livestream, na duessan ina registraziun e l'installaziun d'in archiv audiovisual betg chaschunar grondas investiziuns e pia er esser da responsar ord vista dals custs. Gia oz publitgeschan intgins chantuns (p.ex. ZH, BS, TG e VS; BE e AG mo audio) las registraziuns da las sessiuns en l'internet. Cun realisar la proposta da prender in conclus direct pudess ins segiramain revegnir a las experientschas ed eventualmain er als purschiders da quest servetsch.

Sa basond sin l'artitgel 50 da la Lescha davart il Cussegl grond po il Cussegl grond prender in conclus direct en il sector da sias atgnas cumpetenzas. En quest senn proponan las sutsegnadras ed ils sutsegnaders, ch'i vegnian stgaffidas las premissas tecnicas (e sche necessari giuridicas), per che la populaziun possia persequitar las debattas dal Cussegl grond posteriuramain cun maletg e tun en in archiv audiovisual.

Cuira, ils 18 d'october 2023

Bachmann, Kocher, Stocker, Adank, Bardill, Baselgia, Bavier, Biert, Bischof, Bisculm Jörg, Bleuler-Jenny, Cahenzli-Philipp, Candrian, Cortesi, Degiacomi, Dietrich, Furger, Gartmann-Albin, Gredig, Kaiser, Koch, Krättli, Kreiliger, Mazzetta, Michael (Donat), Müller, Nicolay (Bever), Oesch, Perl, Preisig, Rageth, Rettich, Righetti, Rusch Nigg, Rutishauser, Saratz Cazin, Spagnolatti, Weber